

# DOMINGU VI TEMPU PÁSKUA NIAN – TINAN C

## TEMA

Liturjia domingu ne'e nian destaka Jezús nia promesa atu akompañia ho forma permanente ninia comunidade nia dalan iha istória: ita la mesak; Jezús moris hi'as la'o nafatin iha ita-nia sorin.

Iha *Evanjellu*, Jezús dehan ba nia dixípulu sira oinsá sira mantein iha komuñan ho Nia no afirma filafali ninia prezensa no assisténsia liuhusi “paráklitu” – Espíritu Santu.

*Leitura dahuluk* apresenta mai ita Jezús nia Kreda konfronta an ho dezafiu sira tempu foun nian. Hodi Espíritu nia kbiit, fiar-na'in sira aprende atu dixerne buat ne'ebé esensial husi asesóriu no atualiza proposta sentrál Evanjellu nian, atu Jezús nia mensajen libertadora bele hetan simun husi povu hotu.

Iha *leitura daruak*, dala ida tan apresenta mai ita meta finál dalan Kreda nian: “Jerusalém mesiánika”. Sidade komuñan ho Maromak, vida nakonu, ksolok totál nian.

## LEITURA I – Apóst. 15,1-2.22-29

Ho jentiu barak ne'ebé tama iha comunidade sarani (liuliu depoizde Paulo no Barnabé nia viajen misionária dahuluk) lori sai kestaun esensial ida: tenke impoin la lae prátika Lei Moisés nian ba sira? Ida-ne'e la'ós problema asidentál ka sekundáriu, medida disiplinár ida ka lisan nian, maibé buat ruma fundamentál liu hanesan hatene se salvasaun mai husi sirkunsizaun no observánsia “Torah” judaika, ka husi Kristu mesak de'it. Ho liafuan seluk: Jezús Krsitu mak Na'i no Makso'i mesak ka presiza buat seluk atu to'o ba Maromak no simu husi Nia grasa salvasaun nian?

Komunidade sarani Antioquia nian la iha serteza kona-ba dalan atu tuir. Paulo no Barnabé hanoin katak Kristu de'it to'o ona; maibé ema ne'ebé hakarak habelar judaizmu –sarani sira husi orijen judaika, ne'ebé konserva prátika tradisionál judaizmu nian – defende katak ritu sira “Torah” nian, importante mós ba salvasaun. Nune'e, sarani Antioquia nian decide atu haruka delegasaun ida ba Jerusalém, atu konsulta Apóstolu sira no katuas sira kona-ba kestaun ne'e. Ida-ne'e akontese iha maizumenus tinan 49.

## MENSAJEN

Testu ne'e hahú hodi foti kestaun no apresenta pasu sira atu hetan solusaun: Paulo, Barnabé no seluk tan (Tito mós, tuir Gal 2,1) bá Jerusalém atu konsulta Apóstolu no katuas sira (vers. 1-2). Kestaun ne'e importante tebes to'o halibur dirijente no animadór sira comunidade nian, hanaran “konsíliu apostóliku” ka “konsíliu Jerusalém” nian. Assembleia ida-ne'e diskute kona-ba buat ne'ebé esensial iha proposta kristán (no tenke inklui iha núkleu fundamentál pregasaun nian) no buat ne'ebé asesóriu (no bele husik, la'ós lialoos fundamentál iha fiar kristán).

Maski testu ne'ebé propoin ohin la hateten akontesimentu la'o oinsá, ita hatene husi “Apóstolu sira-nia Hahalok” katak, iha “assembleia ekleziál” ne'e sira enfrenta opiniaun oioin. Pedro rekoñese iguallade fundamentál hotu-hotu nian – judeu no jentiu sira – katak proposta salvasaun nian hanesan ba hotu, no katak Lei naha-todan ida ne'ebé la bele impoin ba jentiu sira no katak hodi “Na'i Jezús Kristu nia grasa” mak ema to'o ba salvasaun (kf.

Apóst. 15,7-12); maibé Tiago (representante husi liras “judaizante), hodi la ba kontra Pedro nia perspetiva, nia buka salva tradisaun judaika no propoin atu mantein tradisaun ruma ne’ebé folin liu ba judeu sira (kf. Apóst. 15,13-21). Iha realidade, iha akordu kona-ba buat ne’ebé. Maski testu Lucas nian la esplísitu, ita komprende sá loos desizaun finál: la bele impoin ba jentiu sira lei judaika; natón de’it Kristu. Nune’e misaun iha jentiu sira leet hetan apoiu atu ba oin, Ne’e mak desizaun importante liu Igreja ne’ebé foin moris mai: kristianizmu tesi husar talin ho judaizmu no agora, bele sai proposta universál ida salvasaun nian, nakloke ba ema hotu, husi rasa no kultura hotu.

Versíkulu 22-29 leitura ohin nian apresenta mai ita “komunikadu finál asembleia Jerusalém nian”: lei judaika la’ós esensiál ba salvasaun nune’e la bele impoin... Husu de’it mak keta halo tuir lisan aat ruma ne’ebé judeu sira hakribi.

Ita presiza destaka, referénsia ba Espíritu Santu iha vers. 28: ema mak foti desizaun, maibé ho Espíritu nia asisténsia. Nune’e, mak hatudu oinsá comunidade sarani nia konxiénsia kona-ba Espíritu nia prezensa, ne’ebé gia Kreda iha nia dalan iha istória.

## **LEITURA II – Ap 21,10-14.22-23**

Ita kontinua lee parte finál livru “Apokalipse” nian. Iha nia, João apresenta mai ita rezultadu husi intervensaun definitiva Maromak nian iha mundu: depoizde Maromak nia vitória hasoru forsa sira ne’ebé hanehan ema no hasai nia husi moris nakonu, moris mai comunidade foun no santa, kriasaun definitiva Maromak nian, lalehan foun no rai foun.

Liturjia domingu kotuk nian apresenta mai ita kuadru dahuluk realidade foun ne’e nian; ohin, realidade hanesan hetan deskrisaun liuhusi kuadru daruak – “Jerusalém mesiánika”.

### *MENSAJEN*

Ilas mak “Jerusalém foun tuun husi lalehan” hanesan domingu kotuk, fatin salvasaun definitiva nian, fatin hasoru malu definitivu entre Maromak no nia Povu.

Iha “Jerusalém foun” nia apresentasaun, domina número “sanulu-resin-rua”: apóstolu sanulu-resin-rua nia naran hakerek iha didin; sidade ne’ebé soi odamatan sanulu-resin-rua (tolu iha lorosa’e, tolu iha tasi-feto, tolu iha tasi-mane no tolu iha loromonu), no iha ne’ebá hakerek tribu sanulu-resin-rua Israel nian; iha tan, anju sanulu-resin-rua iha odamatan sira. Número “sanulu-resin-rua” indika totalidade Maromak nia Povu nian (tribu sanulu-resin-rua + Apóstolu sanulu-resin-rua): sidade harii iha Apóstolu sanulu-resin-rua nia leten – sasin sira “bibioan” nian – maibé integra totalidade Povu Maromak nian husi Testamentu Tuan no Testamentu Foun, ne’ebé to’o iha moris nakonu liuhusi Kristu nia asaun salvadora no libertadora. Odamatan sira hateke ba pontu kardeál sira, indika katak povu hotu (mai husi tasi-feto, tasi-mane, lorosae, loromonu) bele tama no hetan iha fatin ne’e ksolok rohan laek.

Sidade tomak mak Templu ida dedika ba Maromak, no Maromak hela iha nia Povu leet ho forma permanente.

Tan ne’e mak parte ikus testu nian (vers. 22-23) dehan katak sidade la soi Templu: tanba nia la presiza mediasaun basá Maromak nafatin horik iha nia. Dehan mós katak sidade tomak nakonu ho naroman: naroman hatudu prezensa divina (kf. Is 2,5; 24,23; 60,19): Maromak no “bibioan” mak naroman ne’ebé leno comunidade moris nakonu ne’e.

Hotu tiha Maromak nia intervensaun definitiva iha istória, sei mosu sidade foun harii iha apóstolu sira nia sasin; sidade ho odamatan nakloke, simu ema hotu ne’ebé adere ba “bibioan”; iha nia, sira hasoru Maromak no moris iha nia prezensa, hodi simu vida iha plenitude.

## EVANJELU – Jo 14,23-29

Ita iha kontestu “han-kalan despedida nian”. Jezús, harii ona nia comunidade, hodi fó estatutu mandamentu domin nian (kf. Jo 13,1-17;13,33-35), agora esplika oinsá comunidade ne’e sei mantein relasaun ho Nia no Aman, bainhira nia bá ona.

Iha versíkulu anteriór testu ne’ebé propoin mai ita, Jezús apresenta an nu’udar “dalan” (kf. Jo 14,6) no tene dixípulu sira atu la’o tuir “dalan” ne’e (kf. Jo 14,4-5). Katak sá? Jezús, iha mundu nia la’o tuir “dalan” ida – dalan saran an ba ema, servisu nian, domin totál; iha “dalan” ne’e mak ema– Ema Foun ne’ebé Jezús kria – realiza nia an. Jezús nia tenke la’o tuir dalan ne’e. Metáfora “dalan” nian espresa dinamizmu moris nian ne’ebé hatudu progresu; hodi tuir nia, signifika to’o iha maturidade Ema Foun nian, ema ne’ebé dezenvolve ninia potencialidade hotu, ema ne’ebé kria fali ba vida definitiva. “Dalan” ne’e nia rohan mak domin radikál, solidariedade totál ho ema. Iha “dalan” ne’e, ema hasoru Aman. Dixípulu sira laran lahakmatek no iha konfuzauan laran. Sira bele la’o tuir “dalan” ne’e se Jezús la la’o iha sira-nia sorin? Oinsá mak sira mantein komuñau ho Jezús no oinsá sira simu husi nia forsa atu saran an, loron ba loron, sira-nia moris rasik?

### MENSAJEN

Atu tuir “dalan” ne’e presiza hadomi Jezús no rai nia Liafuan (kf. Jo 14,23). Sé mak hadomi Jezús no rona Nia, sai hanesan Nia, katak, moris hanesan Nia, iha saran moris rasik ba ema nia di’ak... Ne’e katak horik nafatin iha komuñau ho Jezús no Aman Maromak. Aman no Jezús, ne’ebé ida de’it, sei halo sira-nia horik-fatin iha dixípulu nia fuan, moris hamutuk iha intimidade família foun ida-nian (vers. 23-24).

Atu dixípulu sira bele kontinua la’o tuir “dalan” ne’e iha *Kreda nia tempu*, Aman sei haruka “paráklitu, katak, Espíritu Santu (vers. 25-26). Liafuan “paráklitu” bele tradús nu’udar “advogadu”, “tulun-na’in”, “konsoladór”, “intersesór”. Funsau “paráklitu” nian mak “hanorin” no “fó hanoin” buat hotu Jezús propoin. Nia sei tulun atu dixípulu sira lee Jezús nia proposta sira iha roman dezafiu foun sira ne’ebé mundu tau iha sira-nia oin. Nune’e, fiar-na’in sira kontinua tuir Jezús nia “dalan”, iha fidelidade dinámika ba ninia proposta sira. Halo nune’e, Espíritu garante, atu fiar-na’in kontinua “dalan” domin no saran an nian, hamutuk ho Jezús no Aman. Komunidade kristán no ema ida-idak sai Maromak nia horik-fatin: iha fiar-na’in sira-nia hahalok sei hatudu sai Maromak libertadór, ne’ebé hela iha comunidade no fiar-na’in ida-idak nia fuan no soi projetu ida ba ema nia salvasaun.

Parte ikus testu nian kontein promessa “dame” nian (vers. 27). Fó “dame” (“shalom”) mak saudasaun ne’ebé baibain fó bainhira to’o no bainhira bá. Iha kontestu ida-ne’e, saudasaun ne’e la’ós despedida hanesan baibain mundu fó, basá Jezús sei la husik dixípulu sira mesak. Jezús hakarak mak kuda iha dixípulu sira ne’ebé preokupadu hela, laran-hakamatek no hasai laran-taridu husi sira. Nia asegura katak akontesimentu sira ne’ebé besik daudaun sei la hakotu relasaun entre Jezús ho ninia comunidade. Liafuan ikus ne’ebé testu ne’e refere (vers. 28-29) subliña katak Jezús nia auzénsia la’ós definitiva, no la’ós naruk. Loloos dixípulu sira tenke haksolok, basá mate la’ós trajédia ida folin-laek, maibé manifestaun aas liu Jezús nia domin ba Aman no ba ema sira.